

Pregled Dokumentata|

Broj 74/05

Početna (/) / Dokumenti (/Docs/)
/ Službene novine Federacije BiH (/Docs/Drzavni) / Dokumenti pregled

Službene novine Federacije BiH, broj 74/05

Ustavni sud Federacije Bosne i Hercegovine odlučujući o zahtjevu premijera Federacije za utvrđivanje ustavnosti Odluke o posebnoj taksi za financiranje sporta i fizičke kulture Općinskog vijeća Općine Livno na osnovu člana IV.C.10. Ustava Federacije Bosne i Hercegovine nakon provedene javne rasprave, na sjednici održanoj 9. novembra 2005. godine, donio je

PRESUDU

OBRAZLOŽENJE

Utvrđuje se da Odluka o posebnoj taksi za finansiranje sporta i fizičke kulture ("Narodne novine Kantona broj 10", broj 5/04), nije u saglasnosti sa Ustavom Federacije Bosne i Hercegovine.

Presudu objaviti u "Službenim novinama Federacije BiH" i "Narodnim novinama Kantona broj 10".

Premijer Federacije Bosne i Hercegovine (u daljnjem tekstu: podnosilac zahtjeva), podnio je dana 12.10.2004. godine Ustavnom sudu Federacije Bosne i Hercegovine (u daljnjem tekstu: Ustavni sud Federacije) zahtjev za utvrđivanje ustavnosti Odluke o posebnoj taksi za finansiranje sporta i fizičke kulture (u daljnjem tekstu: Odluka) Općinskog vijeća Livno.

U zahtjevu je navedeno da je osporenom Odlukom, suprotno ustavnim i zakonskim odredbama, Općinsko vijeće Livno uvelo poreze i takse za finansiranje djelatnosti koje su u nadležnosti kantona (kultura i sport), u visini od 0,2% na ukupan prihod po godišnjem obračunu i završnom računu, čime je uvedena nova vrsta javnog prihoda, koja direktno utiče na rezultate poslovanja preduzeća. Smatra da navedena odluka nije u saglasnosti sa Amandmanom VIII tačka d) na Ustav Federacije Bosne i Hercegovine i članom V.2. Ustava Federacije Bosne i Hercegovine, odnosno Amandmanom XV, tačka 2. na Ustav Federacije Bosne i Hercegovine, kao i sa Zakonom o pripadnosti javnih prihoda u Federaciji Bosne i Hercegovine i finansiranju Federacije Bosne i Hercegovine ("Službene novine Federacije BiH", broj 26/96, 32/98 i 54/01), Pravilnikom o načinu uplate javnih prihoda i budžeta i vanbudžetskih fondova na području Federacije Bosne i Hercegovine ("Službene novine Federacije BiH", broj 60/01, 7/02 9/02, 17/02, 27/02, 66/02, 8/03, 22/03, 37/03, 8/04, 14/04, 47/04) i Zakonom o osnovama lokalne samouprave ("Službene novine Federacije BiH", broj 6/95). Iz tih razloga podnosilac zahtjeva predlaže da Ustavni sud Federacije utvrdi da Odluka nije u saglasnosti sa Ustavom Federacije Bosne i Hercegovine.

U odgovoru na zahtjev i na javnoj raspravi istaknuto je da je navedena Odluka donesena na redovnoj sjednici Općinskog vijeća održanoj dana 26.3.2004. godine, na prijedlog Odjeljenja finansija Općine, a na osnovu člana 2. i 3. Odluke o načinu finansiranja sporta i fizičke kulture na prostorima Kantona broj 10 ("Službene novine Kantona broj 10", broj 7/02), kao i odredaba federalnog i kantonalnog zakona o lokalnoj samoupravi i Statuta Općine Livno. Tvrdi se da je inicijator za donošenje navedene Odluke bila Porezna uprava, a radi ubiranja sredstava koja navodno nije mogla ubirati na osnovu navedene kantonalne odluke. Navedeno je da je nesporna nadležnost kantona u oblasti obrazovanja i kulture, kao i činjenica da kanton može prenijeti svoju nadležnost na općine na svojoj teritoriji. Pošto je sport po svojoj prirodi javna djelatnost najsirodnija obrazovanju i kulturi, mišljenja su da Kanton i Općina nisu izašli iz okvira ustavnih nadležnosti, jer se u konkretnom slučaju ne radi o utvrđivanju fiskalne politike ili o neovlaštenom prisvajanju javnog prihoda, već o uobičajenoj i primjenjivoj metodi za omogućavanje provedbe potreba iz oblasti kulture, tačnije sporta. Naglašava se da je članom 9. stav 1. tačka 2. Zakona o lokalnoj samoupravi ("Narodne novine Kantona broj 10", broj 4/98) propisano da općina poduzima sve potrebne mjere u cilju stvaranja i razvijanja materijalnih i drugih uvjeta za život i rad i zadovoljenje materijalnih i zajedničkih potreba, u skladu sa utvrđenom politikom i propisima kantona i Federacije. Tačka 11. navedenog Zakona propisuje da općina donosi propise o oporezivanju i na drugi način osigurava potrebno finansiranje koje nije osigurala vlada kantona ili federalna vlast. Članom 8. Zakona o osnovama lokalne samouprave utvrđeno je da će se u općini prvenstveno osigurati lokalna potreba stanovništva u oblasti brige o djeci, obrazovanju i vaspitanju, radu i zapošljavanju, socijalnoj brizi, kulturi, fizičkoj kulturi i sportu. Zatim članom 14. da općine imaju

pravo i na sredstva za obavljanje prenesenih poslova iz okvira prava i dužnosti kantona. Mišljenja je da su citirane odredbe u saglasnosti sa članom VI.4.C) Ustava Federacije Bosne i Hercegovine.

Predlaže se da se zahtjev odbije kao neosnovan.

Nakon provedene javne rasprave održane 21.6.2005. i 8.11.2005. godine Ustavni sud Federacije odlučio je kao u izreci presude iz slijedećih razloga:

Amandmanom VIII d) na Ustav Federacije Bosne i Hercegovine propisano je da je u isključivoj nadležnosti Federacije, pored ostalog, "donošenje propisa o finansijama i finansijskim institucijama Federacije i fiskalna politika Federacije". Na temelju navedenih ustavnih ovlaštenja Federacija je donijela Zakon o pripadnosti javnih prihoda u Federaciji Bosne i Hercegovine i finansiranju Federacije Bosne i Hercegovine, kojim je uređena pripadnost javnih prihoda koji su ustanovljeni zakonima na teritoriji Federacije Bosne i Hercegovine i odnosi u oblasti sistema finansiranja ustavom utvrđenih funkcija Federacije i kantona. Ovim zakonom pripadnost svih javnih prihoda u Federaciji podijeljena je između Federacije (član 4.) i kantona (član 7.), dok je članom 8. stav 1. navedenog Zakona propisano da općinama pripadaju javni prihodi u skladu s kantonalnim propisima. Stavom 2. istog člana regulisano je da općinska vijeća donose propise o općinskim taksama (komunalne takse, novčane kazne i drugo), kao i propise o oporezivanju (porez od poljoprivrede, porez na imovinu, porez na prihod od imovine) i na drugi način osiguravaju potrebno finansiranje.

Ustavom Federacije Bosne i Hercegovine utvrđena je podjela nadležnosti između federalne i kantonalne vlasti (član III.1.2.4.), te amandmanima VIII i IX na Ustav Federacije Bosne i Hercegovine. Članom III.4.c) Ustava Federacije Bosne i Hercegovine određeno je da je kanton nadležan za utvrđivanje i provođenje kulturne politike, u što spada i sport i fizička kultura. Takođe članom III.4. Ustava Federacije Bosne i Hercegovine propisano je da "kantonima pripadaju sva ovlaštenja koja nisu izričito dodijeljena federalnoj vlasti".

Amandmanom XV na Ustav Federacije Bosne i Hercegovine regulisano je da svaki kanton može prenijeti svoje nadležnosti na općinu i grad na svom teritoriju ili na federalnu vlast. U konkretnom slučaju u postupku koji je proveden pred Ustavnim sudom Federacije nije utvrđeno da je Kanton u smislu navedenog Amandmana na Ustav Federacije Bosne i Hercegovine na općine na svom teritoriju prenio svoje nadležnosti u oblasti sporta i fizičke kulture.

Polazeći od citiranih odredaba Ustava Federacije Bosne i Hercegovine i Amandmana na Ustav Federacije Bosne i Hercegovine, Ustavni sud Federacije je utvrdio da Općinsko vijeće Livno nije moglo propisati plaćanje posebnih taksi za finansiranje djelatnosti sporta i fizičke kulture kako je to propisano u navedenoj Odluci, pogotovu što Zakonom o pripadnosti javnih prihoda u Federaciji Bosne i Hercegovine i finansiranju Federacije Bosne i Hercegovine, nije utvrđeno pravo Federacije, kantona i općine na javne prihode (poreze ili takse) iz ukupnog prihoda pravne osobe. Iz navedenih razloga Ustavni sud Federacije je ocijenio da navedena Odluka Općinskog vijeća Livno nije u skladu sa Ustavom Federacije Bosne i Hercegovine.

Ovu presudu donio je Ustavni sud Federacije odlučujući u sastavu: prof. dr. Nedjeljko Milićević, predsjednik Suda; Sead Bahtijarević, mr. Mirko Bošković, mr. Ranka Cvijić, Muamer Hercegljija, Domin Malbašić, Kata Senjak i prof.dr. Kasim Trnka, sudije Suda.

Presuda je donesena većinom glasova.

Broj U-29/04
9. novembra 2005.godine
Sarajevo

Predsjednik
Ustavnog suda
Federacije BiH
prof. dr. **Nedjeljko Milićević**, s. r.

Hvala što ste naš pretplatnik. Koristite pogodnosti koje dobijate pretplatom.



O nama

Javno preduzeće Novinsko-izdavačka organizacija
SLUŽBENI LIST BOSNE I
HERCEGOVINE. Sva prava
pridržana. 2014

Adresa

Džemala Bijedića 39/III
71000 Sarajevo
Bosna i Hercegovina
Email: sllist@sllist.ba
(<mailto:sllist@sllist.ba>)

Kontakti

Centrala

Tel: 033/722-030

Email (<mailto:info@sllist.ba>)

Uredništvo

Tel: 033/722-038

Email

(<mailto:urednistvo@sllist.ba>)

Pravna služba

Tel: 033/722-051

Email (<mailto:info@sllist.ba>)

Računovodstvo

Tel: 033/722-045, Fax:

033/722-046

Email

(<mailto:racunovodstvo@sllist.ba>)

Pretplata

Tel: 033/722-054

Email

(<mailto:pretplata@sllist.ba>)

Ekspedit

Tel: 033/722-041

Email (<mailto:info@sllist.ba>)

Prodaja

Tel: 033/722-079

Email (<mailto:info@sllist.ba>)

Oglasni odjel

Tel: 033/722-049 i

033/722-050, Fax:

033/722-074

Email

(<mailto:oglasi@sllist.ba>)

Tehnički sekretar

Tel: 033/722-061, Fax:

033/722-064

Ured direktora

Tel: 033/722-061

Komercijala

Tel: 033/722-042

